

## Gereformeerde Kerk Bellville – 23 Julie 2017 – Aand

**Sing vooraf staande:** Psalm 21:1, 9 (p. 94)

- 1 U maak, o HEER, die koning bly, / omdat u arm so sterk is, / sy heil deur u bewerk is.  
Sy wens het hy van U verkry; / U het wat hy begeer. / geweier nóg geweier.
- 9 Verhef U in u sterkte, HEER, / en laat u groot vermoë / gesien word voor die oë  
van almal wat U roem en eer! / Ons buig ons voor u mag / en prys u heldekrag.

Ons hulp is in die Naam van die Here wat die hemel en die aarde geskape het.

Geliefdes, genade en vrede vir u van God ons Vader en die Here Jesus Christus deur die kragtige werking van God die Heilige Gees.

**Amen.**

Psalm 47:1, 3 (p. 240)

- 1 Juig, o volke, juig! Handklap en betuig / voor die HEER jul vreug! Wees in God verheug!  
Sing Hom lof en prys op verhewe wys, / want bo al wat leef en voor Hom moet beef,  
sal sy septer wink en sy glorie blink – / Allerhoogste in eer, groot is God die HEER!
- 3 God vaar voor die oog met gejuig omhoog; / die trompette blink, die basuine klink:  
met 'n groot geskal styg bo berg en dal / God se glorie uit. Laat nou die geluid  
van jul psalme hoor: laat 'n jubelkoor / Hom, die Vors en Heer van die aarde, eer!

Gebed

Skrifberyming 6-1:1, 2, 3 (Sb 11)

- 1 Die laagte deur waar die olywe staan, / het hul met Jesus na die berg gegaan;  
En dáár het Hy, in stilte ongestoord, / tot hul gesprek sy laaste lewenswoord:
- 2 “Jul wat só na die Godsryk al verlang, / sal nou die kragte van die Gees ontvang,  
En oor die wydtes dan van land en see / uit nuwe krag van My getuig'nis gee.”
- 3 En toe het Hy, terwyl hul na Hom staar, / geruisloos opgestyg en weggevaar.  
'n Digte waas het Hom geheel oordek, / 'n wolk het Hom sag aan hul oog onttrek.

**Skriflesing:** Handeling 1:1-11; Romeine 8:31-39; Heidelbergse Kategismus,  
Sondag 18:46

**Kernvers:** Handeling 1:9-11; Romeine 8:34

**En nadat Hy dit gesê het, is Hy opgeneem terwyl hulle dit sien; en 'n wolk het Hom voor hulle oë weggeneem. En toe hulle nog stip na die hemel kyk terwyl Hy weggaan, staan daar twee manne in wit klere by hulle, wat sê: Galilése manne, waarom staan julle en kyk na die hemel? Hierdie Jesus wat van julle opgeneem is in die hemel, sal net so kom soos julle Hom na die hemel sien wegvaar het.**

(Handeling 1:9-11 AFR53)

**Wie is dit wat veroordeel? Christus is dit wat gesterf het, ja, meer nog, wat ook opgewek is, wat ook aan die regterhand van God is, wat ook vir ons intree. (Romeine 8:34 AFR53)**

## Heidelbergse Kategismus

### Vraag 46: Wat verstaan jy onder: wat opgevaar het na die hemel?

*Antwoord: Christus is voor die oë van sy dissipels van die aarde af na die hemel opgeneem (a) en Hy is vir ons daar ten goede (b) totdat Hy weer kom om oor die lewendes en die dooies te oordeel (c).*

*(a) Hand 1:9; Mark 16:19; Luk 24:51. (b) Heb 9:24; 4:14; Rom 8:34; Kol 3:1. (c) Hand 1:11; Matt 24:30.*

**Tema:** Christus het werklik opgevaar na sy Vader in die hemel

Geliefde gemeente van ons Here Jesus Christus, die vraagsteller in die gesprek met die gelowige was skepties oor die feit dat die gelowige bely dat Jesus uit die dood opgestaan het. In die vorige gesprek het die gelowige vir hom vanuit die Skrif aangetoon dat die opstanding 'n werklikheid is wat God die Vader self bewerkstellig het.

Daardie insig wat die vraagsteller gekry het, het ongelukkig nie al sy agterdog weggeneem nie. In die vraag wat hy oor die hemelvaart van Jesus het, hoor 'n mens nog die agterdog. Hy het sy eie verwronge siening oor hemelvaart. Soos baie ander mense dink hy dit is maar 'n fabel. Daarom vra hy vir die gelowige: **Wat verstaan jy onder: wat opgevaar het na die hemel?** Wanneer 'n mens so 'n vraag antwoord, is dit belangrik dat 'n mens by die feite hou wat die Here self aan ons openbaar.

Broers, susters en kinders, ons hoor die feite van Jesus se hemelvaart opgeteken in Handeling 1. Wanneer 'n mens oor die feite van Jesus se hemelvaart praat, is dit ook nodig om te sê hoekom Hy na hemel opgevaar het en hoe lank Hy daar sal wees. Die antwoord wat die gelowige op die vraag gee, klink so: **Christus is voor die oë van sy dissipels van die aarde af na die hemel opgeneem en Hy is vir ons daar ten goede totdat Hy weer kom om oor die lewendes en die dooies te oordeel.**

Die feit is dat Christus voor die oë van sy dissipels van die aarde af na die hemel opgeneem is. Na sy opstanding uit die dood was Jesus vir nog veertig dae saam met sy dissipels op die aarde. Gedurende daardie veertig dae het Jesus die toerusting van sy dissipels afgerond. Jesus het aan sy dissipels duidelik gemaak waarom Hy aan die kruis gesterf het en waarom sy Vader Hom uit die dood opgewek het. Hy het ook die toerusting aangaande die koninkryk van God vir hulle afgerond.

Die veertigste dag het toe aangebreek. Jesus het saam met sy dissipels uit Jerusalem in 'n oostelike rigting gestap. Toe hulle op die Olyfberg gekom het, het dit voor die oë van die dissipels plaasgevind. Jesus is van die aarde af opgeneem terwyl hulle na Hom gekyk het. Die dissipels het gesien hoe Jesus al hoër en hoër opgeneem word van die aarde af. In 'n stadium het 'n wolk Hom voor hulle oë weggeneem sodat hulle Hom nie meer gesien het nie. Hierdie feite het die apostels by 'n latere geleentheid aan Lukas vertel. En die Heilige Gees het Lukas gelei om dit neer te skryf sodat dit behoue kon bly vir die kerk van die Here.

Ons het die vraagsteller al leer ken as iemand wat ook die Bybel lees – nie noodwendig om die Here te leer ken nie, maar om moeilike vrae vir die gelowige te vra. Daarom val hy die gelowige in die rede en sê: Maar Lukas het mos ook aan die einde van die evangelie oor die hemelvaart geskryf. Maar daardie gedeelte in Lukas 24:50-53 stem nie heeltemal ooreen met hierdie gedeelte in Handeling 1 nie.

Dit is waar. Daar is bepaalde verskille tussen die twee vertellings. Die verskille kan egter nie gebruik word om te sê dat die hemelvaart nie werklik is nie. Dit is immers

die Heilige Gees wat vir Lukas gebruik het om die boek Lukas en Handelingte te skryf. Die Heilige Gees het 'n spesifieke doel met elkeen van die boeke, daarom is daar verskille in die vertellings. As 'n mens die twee vertellings langs mekaar lees, komplementeer hulle mekaar. Daar is net drie verskille tussen die twee vertellings. Daar is vyf ooreenkomste tussen die twee vertellings en dit weeg swaarder as die verskille.

In albei vertellings gee die Heilige Gees die feite weer. Jesus Christus het werklik na die hemel opgevaar. Daar is geen rede om hierdie getuienis van Lukas anders te verstaan as wat 'n mens daar lees nie. Die algemeen aanvaarbare manier van verstaan van die Skrif is dat ons dit letterlik verstaan tensy die Heilige Gees vir ons in die teks aandui dat ons dit anders moet verstaan.

Daarby moet ons raaksien hoe baie klem die Heilige Gees lê op die feit dat daar mense was wat gesien het dat Jesus opgeneem is in die hemel. In die drie verse in Handelingte 1 word daar nie minder nie as vyf keer verwys na die feit dat die dissipels met hulle eie oë gesien het dat Jesus opgeneem is. Op grond van hierdie beklemtoning van die Heilige Gees bely ons in die Kategismus dat **Christus voor die oë van sy dissipels van die aarde af na die hemel opgeneem is**. Wanneer daar 'n apostel in die plek van Judas Iskariot gekies moet word, hoor ons dat die aanskouing van die hemelvaart een van die vereistes moet wees vir iemand wat as apostel van Jesus kan dien (Hand 1:21-22).

Buitendien het die hemelvaart van Jesus 'n baie duidelike verstaanbare doel wat Jesus self verwoord het nog voor sy kruisiging. In die nag voordat Hy gevange geneem is, het Hy gesê dat Hy weggaan. En Hy het beklemtoon dat Hy moes gaan sodat die Heilige Gees as Trooster kon kom (Joh 16:7). In die veertig dae voor die hemelvaart het Jesus die dissipels weer verseker dat die Heilige Gees sal kom. Wanneer die Heilige Gees kom, sal die apostels getuies van Jesus wees. Jesus is beslis vir die gelowiges ten goede in die hemel. Tien dae na sy hemelvaart het Hy die Heilige Gees uitgestort op sy kerk.

Gedurende die veertig dae na sy opstanding het Jesus verskeie kere aan gelowiges verskyn. By sommige van hierdie verskynings lees ons ook dat Hy skielik uit hulle gesig verdwyn. Maar op die veertigste dag verdwyn Hy nie net nie. Voor hulle oë is Hy opgeneem sodat die dissipels kon begryp dat sy weggaan hierdie keer finaal is. Hulle hoef daarom nie te wag vir nog 'n verskyning nie. Daarom het hulle ook Jerusalem toe gegaan om te wag op die belofte van die Heilige Gees, want Jesus het nog altyd sy Woord gehou. En tien dae later het hulle die belofte ontvang toe die Gees uitgestort is.

Geliefdes, met hierdie toerusting wat die Heilige Gees ons in die Woord gee, kan ons die moedswilliges tereg wys en die wat verward is reg help. Die hemelvaart van die Here Jesus is die volle waarheid. Maar dit is nie al rede hoekom ons van die hemelvaart by monde van Lukas hoor nie. Ons wil nog weet watter gevolg Christus se hemelvaart vir ons daaglikse lewe het.

Die onmiddellike gevolg van Christus se hemelvaart was dat die dissipels na Jerusalem teruggekeer het om op die belofte van die Here se Heilige Gees te wag. Hulle het met groot blydschap teruggekeer. Wat doen die hemelvaart van Christus aan ons? In antwoord daarop kan 'n mens die hele Bybel deurlees om te sien watter uitwerking Christus se verlossingswerk in sy geheel op ons behoort te hê. Daar is egter 'n voor die hand liggende antwoord in ons kernverse. Daarvoor vestig die Heilige Gees ons aandag op die twee manne wat in wit klere by die dissipels gestaan het. Hierdie twee manne was engele wat daar by die dissipels gestaan het.

Lukas maak van die werk van die engele melding by elke groot moment in die lewe van Jesus op aarde wat vir ons aandui waarheen die Here met alles op pad is. Engele was teenwoordig by die aankondiging van Jesus se geboorte. In die tuin in Getsémané het die engele Jesus versterk. Twee engele in spierwit klere het die opstanding van Jesus aan die vrouens verkondig. Daarom is dit ook gepas dat die engele by Jesus se hemelvaart sal wees om die betekenis daarvan duidelik te maak. Dit is opmerklik dat die begrip *opkyk na die hemel of in die hemel in* tot vier keer in vers 10 en 11 voorkom. Met daardie herhaling en die engele se woorde kan ons met sekerheid aflei dat die dissipels nie hemelbeskouers moet wees nie. Christus het ons nie verlos om verdwaas of in verwondering op te staar na die hemel nie. Daar is twee redes daarvoor.

Die eerste rede: Jesus sal terugkom.

**Hierdie Jesus wat van julle opgeneem is in die hemel, sal net so kom soos julle Hom na die hemel sien wegvaar het.** (Handelinge 1:11 AFR53)

Die dissipels se gestaar na die hemel sal nie Jesus laat terugkom nie, hoe graag hulle dit ook al in daardie stadium wou gehad het. Jesus sal terugkom op die vasgestelde tyd. Ons moet egter nie verstaan dat Jesus se wederkoms sal plaasvind soos 'n film wat maar net agteruit gespeel word nie. Ons hoor uit die Woord dat daar ooreenkomste is tussen sy weggaan en wederkoms, maar daar is ook verskille.

Wat die ooreenkomste betref:

- **Hierdie Jesus** sal terugkom. Dieselfde verheerlikte Jesus Christus, die Seun van God, sal terugkom.
- Die wederkoms sal net soos die hemelvaart sigbaar vir mense gebeur. Mense sal Hom sien terugkom soos wat die dissipels hom gesien gaan het.
- En Jesus sal weer op 'n wolk terugkom soos Hy gegaan het. Die wolk is reeds in die Ou Testament met die uittog uit Egipte en ook in die Nuwe Testament teken van God die Vader se persoonlike teenwoordigheid. Die Vader het sy Seun opgeneem in die hemel. Die Vader sal sy Seun weer na die aarde terugbring.

Maar daar is belangrike verskille tussen die hemelvaart en wederkoms:

- Alhoewel Jesus Christus persoonlik weer kom, sal sy wederkoms nie privaat wees nie. Die hemelvaart is net deur die dissipels gesien. Sy wederkoms sal wêreldwyd sigbaar wees.
- Waar Jesus alleen opgeneem is, sal Hy met sy wederkoms nie alleen wees nie. Saam met Hom sal sy leërskaare van heilige engele wees.

Die engele het nie iets nuuts vir die dissipels gesê nie. Hulle het net Jesus se eie woorde bevestig. Hy gaan terugkom en as Hy weer kom, kom Hy om oor die lewendes en die dooies te oordeel. Die dissipels het dit geglo, daarom het hulle teruggegaan na Jerusalem. Die apostels het so vas geglo dat Jesus gaan terugkom dat hulle verskeie kere verkondig het dat die wederkoms naby is. Glo ons nog vas dat Jesus weer sal kom? Of het ons dit ook maar uit ons gedagtes uitgeskuif omdat alles jaar na jaar so normaal en doodgewoon voortgaan? Laat ons nie vergeet nie. Anders as Jesus se hemelvaart sal sy wederkoms skielik wees soos 'n dief in die nag. As Christene lewe ons dan nugter en in afwagting, want sy wederkoms is naby. Jesus het nog altyd gedoen wat Hy gesê het Hy sal doen.

Die tweede rede word in die woorde van die engele veronderstel. Jesus sal weer terugkom, maar tot dan moet die dissipels getuies wees van die verlossingswerk van Jesus Christus.

Daar was 'n fundamentele afwyking in die dissipels se reaksie op Jesus se hemelvaart. Hulle staan en opkyk na die hemel terwyl hulle die opdrag gekry het om na die eindes van die wêreld te gaan. Hulle oë moet gerig wees op die wêreld, nie op die hemel nie. Hulle is immers geroep en toegerus om getuies te wees, nie toeskouers nie. Om in nostalgie na die hemel te staar gaan niks aan die huidige omstandighede verander nie. Jesus kom terug op die tyd wat die Vader bestem het. As apostels moet hulle blik nou op die wêreld gerig wees waarheen die Here hulle gestuur het om Christus met deernis en oorgawe aan die verlore wêreld te verkondig.

Hierdie opdrag is egter nie beperk tot die apostels nie. Hierdie opdrag is 'n opdrag aan die kerk van die Here oor die aarde heen. En die kerk is beslis nie net die ouderlinge, predikante en diakens nie. Die kerk is elkeen van ons wat met die kosbare bloed van Christus losgekoop is en toegerus is met die Heilige Gees om van sy wonderbare daade te vertel in hierdie wêreld. Ons moet dus nie ons tyd vermors deur te spekuleer oor die hemel en wat daar gebeur en wie eendag daar gaan wees, of wanneer Christus gaan terugkom nie. Hy kom, daarvoor hoef ons nie te wonder of bekommerd te wees nie. Maar totdat en voordat Hy terugkom het ons 'n opdrag wat uitgevoer moet word. Ons moet Hom as die gekruisigde aan almal verkondig in woorde en in daade.

Geliefdes, die Heilige Gees rus ons toe met hierdie Skrifgedeelte sodat ons nie vasgevang word deur na die hemel te staar nie maar raak te sien dat die Here met sy ganse skepping op pad is na die laaste dag. Daarom moet ons die volgorde van gebeure raaksien en begryp. Christus het teruggegaan na sy Vader in die hemel en die Heilige Gees het gekom om ons te troos en te lei en te leer. Met hierdie toerusting word ons – die kerk – uitgestuur. En die laaste gebeurtenis is die wederkoms van Jesus. Ons moet hierdie volgorde behou, want wanneer ons dit verkeerd gaan rangskik, gaan daar ontelbaar baie dinge onverklaarbaar wees. Tussen die hemelvaart en die wederkoms is daar 'n onbekende tydperk – ons weet nie hoe lank dit gaan duur nie. Mag ons egter gehoorsaam wees aan die Here sodat wanneer Hy terugkom Hy ons aan die werk kry en nie starende na die hemel nie.

**Amen!**

Slotgebed

Skrifberyming 6-1:4, 5, 6 (Sb 11) Vir vers 6: Laaste twee reëls van melodie

- 4 Terwyl hul smagtend na die hemel kyk / en Jesus altyd verder van hul wyk,  
het daar twee manne<sup>n</sup> in wit gewaad kom staan, / die spreek hul met 'n hemelboodskap aan:
- 5 O manne, nou vereensaamd en alleen, / wat staan en staar jul na die hemel heen?  
Die Jesus wat gevaar het na omhoog, / sal net so kom, verheerlik voor die oog."
- 6 En van die berg waar die olywe staan, het hul met blydskap na die stad gegaan.

Die genade van ons Here Jesus Christus, die liefde God die Vader en die gemeenskap van die Heilige Gees sal met elkeen van julle wees en bly.

**Amen.**

Ds Coenraad Vrey  
Gereformeerde Kerk Bellville  
23 Julie 2017